



Ляль
харан
удты
хойтлува
нётас

3»



Пулцават вош волаң нэман юкантса

Там лапатаң ветхоцъяңмет хаталаң Владимир Путин Пулцават вош «Город трудовой доблести» нэман юкантсалды. Там вошев Россия доватан лапатмет питал, хой тамаш нэм тайд.

Ун Ляль порайн Пулцават вош элты худ, нёхи, мисъийңк, па мув харатан энмалтам лэвпасат тутдысайт. Думатты сох ёнтыдыса, танковой колоннайт ураңан ох актыдыса. Асан па Солмийн конвой ун тутаң хопат яңхилдысат.

Хольмаң педа кат миллион консерва, хутъяң щёрас центнер худ элты верам лэвпас. Сот щёрас худ солыты пуцка, худамсот щёрас ларащ консервайт понты ураңан верса. Щи веран щёрас молтас хоят орден Трудовой Славы мощатас, «За доблестный труд в Великой Отечественной войне 1941-1945 гг» мевалпосан юкантсайт.

Тамаш волаң нэм мощатты ураңан ар рупата верман уса. Хоятатан шукаң пора нумда.



Хор: ЯНАО губернатор пресс-служба

Талдал ара ювам хоятат шеңк такан нётсат. Щи вер щирани рупитты хоятат архив элты мосты нэпекат акатсат, вошаң хоятат пидан уйтантысат, хой ляль

порайн рупитыйс, нох питты веран щём па юр поныдыйс.

Щи пораятан ай куртат элты там вошева вой сохаң, хулаң ухлат па талассат. Куртаң

мохилув ляльн нох питам веран шеңк нётсат.

Аллина Тоярова
ханшам потар

Потар ханшты касася



Хор: салехард89.рф

2025 тал Хон мувеван Мув сайдаты хоят тада постаса. Округеван па там тал Герой тал нэман понтса. Ялап тал постаң нэм пуншты щирани, Пулцават вош ашкулдаятан уталтыты няврэмат кутан, «Ма волаң хоятэм» потар ханшты касася верса.

Щи касасяя мет ода худмет ашкулдайн уталтыты няврэмат пилтацсат па потар ханшсат. Яң хатд хащты юпийн яма ханшам рупатайт пирыдайт.

Потар яма ханшам вет няврэм Хон Петра воша яңхты нэпекан мойлаптадайт. Щита лувилала вош хорамат альдайт, каш верты па катра пормас шавиты хотата тутдыдайт.

«Муң ашкулдаеван уталтыты няврэмат СВО хоша улам хоятат пидан иса уйтантылат. Ин удты хоятата восты тураң илпийн яма удты ураңан, муы щирани опрацлуд рут мувев сайдаман Волаң Лялян лялассат, уталтаты хоятлуван потартлаюв. Хоты округеван ялап вошат омассайт, мув тут йиңк па тут шув каншам хоятат рупитсат. Худ-вой ведпаслаты па тащ хотан рупитты ёх, мис пусты па вой энмалты хоятат ищи волаң хоятата луңтаслат. Ма нумастэман, кашң няврэм лув хоттэл мохилад кутан Волаң хоят ищи па ул.

Ин па потар ханшмев юпийн яха уталтыты пилдам пидан давдасты питлуд, мосаң матты хоятэв потрал нох питал па Хон Петра вош хорамат вантты яңхал», – нийлмет классан уталтыты эви Яна Семёнова ястас.

Каматса яма ханшам потар шупиет аудиоролика похла акатдайт па вошаң хоятат тутдыты машинаятан радио хуват худантты питдайт.

Зоя Куртямова
ханшам потар

Сорашак айкел мощатты ураңан

«Дух Авт» газета кашң лапат йи пуш этдыйл. Тухал ишан, ёхаттад унты тадаң лапат хащад. Щи веран, сорашак айкелат мощатты ураңан, нынан мосал «Дух Авт» поныдыты айкелат «ВКонтакте» па «Одноклассники» хоша мощаттыты.

Щи ураңан там QR-код мохты луңаты, па муң верыдыты айкелдува ханшлтыяты. Кимет ве-

ран, айкел луңатты тумпийн, щита рахалд ясаң ханшты, потран сама ки рахас – пос понты.

Муң па, нын вантам айкелдан элты ищи нопсэв тьел-тохел поныдылэв, вантлэв – мата айкелат па муы элты хоятат луңатты лаңхалайт.

Тумтак ёшна, тумтак курна ханты мир улапсаев ияха понасан елды тулэв, ханты мир ясеф шавилэв!



Тампуш аршак округ хоят яммалтыл

Ялап талдан нядсот педа яр-сот сёрс округ хоят яммалтыты верытал. Кашң леккар хотан хоятат туңа-сира вантлайт, мушдал дэраплайт. Па мув суңат пидан артадаман округев мет ямшак улмал.

Леккар хота ёхтыдыты хоятат хол иултыя вантлайт, няврэм педа улты нэңат мет шопаң ванан тайлайт. Хоятат мушдал дэрапты юпийн, мохтышак яммалтыты китлайт.

Хасям талдан нийлхус тал элты ветьяң педа яртьяң тал унты нийлъяң педа няд сёрс хоят вантса. Хольмаң педа хут сёрс хоят симась диспансеризация верас. Кат сёрс ветсот хоят киметты мушдал артадаты китсайт. Ветхосьяң сёрс молтас хоят муш ант таймел, хасям хоятат кутан муш уятса.

Кашң тал элты артадаман, аршак хоят лувел вантман па шавиман тайты питас. Хасям талдан худамсот педа ветхосьяң сёрс хоят леккар хота яңхас.



Хор: Альбина Тырлина

Тампуш Ямал мув леккарат «Каркама хув елды улты удапса» нацпроект хуват рупатаел елды туты питлэд. Кашң хоят ох ант

сохаптаман, ОМС полис хуват леккаратан вантты верытла.

Альбина Тырлина ханшам потар

Ветсот няврэм нох питты кеша дэсятда

Хон мув олимпиадайт ханштыя, округ няврэмлув ветхосьяң уталтаты хоятан дэсятты питлайт. Си кеша уталтаты хоятат повышение квалификации курсата па переподготовкая китыдысайт.

Олимпиадаятан нох питты московской Ассоциация хося манам касапсайн няврэмат уталтаты хоятат пирьсайт па сита рупитты хоятатан уталтасайт. Ямал мув няврэмлува симась уталтапса шеңк нётал. Симась проект Пулңават, Новый Уренгой па Ноябрьск вош ашкудаятан верса.

Кашң няврэм дэсятты хоят тыдась хольмаң сёрс солкувайн сохаптада. Там мосванан Ямал олимпиадной сборная лоңам няврэмат тал сменяя Московской физико-технологической института яңхасат, химия предмет хуват кассат.

Аршак хоят сютсяты верытал

Хасям талдан округ губернатор партам сирн, нётапса охат шитты вер кеншака дэсятса. Ин пирась хоятат яммалтыты ураңан сохапаты охат кат тал сис йи пушматы питлайт. Сютсяты яңхты аршак верытлат.

Си нётапса шитты ураңан нэпекат маты хоят аршака йис. Округеван хутъяң педа вет тал элты ант рупитты нэңат па хутъяң тал элты ант рупитты ёх хоятат хон мув сютсяты тахаятан яммалтыты верытлат. Округ элты охан сохаптадайт. Йи хатл сис кат сёрс нийлсот солкувайн мадайт. Ияха хутъяң сёрс солкувайн сохаптадайт.

Нэпекат МФЦ хотан маты рахал па социальной защита департамент сайт хося китты. Ёхды сохапаты охдал хон мув сютсяты тахайн па улты тахайдалан вуты рахал. Сютсяты порайл – худам лапат унты.

Округ пирась хоятат си охат шитты тумпийн, хот сохапаты охан, тыдась па пенсиял хося социальной нётапсайн мадайт, вош хуват яңхты автобусан билет охал ант сохаптадэл.

Альбина Тырлина ханшам потар

Тыдащ улты кем ох ялпа луңатса

Шоши мувеван, 2025-мет талдан ялап тал тыдащ олаңмет хатл элты тыдащ кем улты ох 24 294 солкува арата йис, тунял 21 760 солкува ус. Луңатты щиран 11,6% элдас.

Кашң хоят, лув улты кемалан, тыдащ мосты арат охан луңатман ул. Рупитты хоятат кеша, охал 26 480 солкувая хойл, пиращ

хойтата – 20 893 солкува, няврэмата – 23 565 солкува.

Тыдащ кем ултыя луңтам ох, нётапса охат луңатты порайн шеңк мосал. Хоятат нётапса вуты нэпекдал лэчаттыин, муй арат ох сохапаты мосал, щи удапса ох ловатл хуват нётапса охан луңатлайт.

Нётапса ох ёша вуты хоятат кутан пиращ па мушаң хоятат, ар няврэм тайты хоттэдат, шукащты па антиды-ащиды хащам няврэмат, ляль харан улам, ин щита улты ёх па лув хоттэд мохилад, тыдащ ёша вуты охал шимла хойты хоттэдат тохи луңтаслат.

Ямал мувеван яр-сот арсыр нётапса вер лэчатман ул. Улты щиран, тыдащ мосты арат ох элты илшак ант питты ураңан, нётапса охат там пуш, холдыена 7,3% элатсайт.

Зоя Куртямова ханшам потар

Мет ямашак рупатаел тусэл

Кашң куртан, кашң вошан Овс мув шимлаң мир хоятат удапса сайлаты Советат улдат. Хащам талдан мет яма па тусшака Дорвош районаң мохет рупитсат.

Там рупата артадам порайн вантса, шоши мир сайлаты ураңан, хоты сахат нормативной нэпекат лэчатман усат. Хоятат молты инщасапса па туңматты вер пидан ёхтылымелан, хоты сора вер туңматса. Еңта пасан суран камн пуш актащисат, хоятат пидан уйтантысат. Айкел верты хоятат пидан уйтантысат па потар тувилдысат, щи тумпийн па хорпи рупата па артадаса. Там талдан, нумастэман, ищиты юр понман елды рупитлат.

Аллина Тоярова ханшам потар



Ляль харан улты хоятлува нётапса

Хор: vk.com/popovolegshur



СВО хоца улты ёхлува там ванан Љорвош район элты кат машина китса. Щимащ нётапса Љорвош па Мужи вошан улты хоятат лэщатсат.

Машинайт верты ёра вер тайты ху Илья Пиналей рупитты ёхлад пидан, рупата сахат тын ант вуйман, ляль хара китты машинаңан яма лэщатсалдал. Мосты карты щуңкат па машинайн сопаса тайты пормасат нётапса верты фонд хуват лутсайт.

Тунял ляль манты харат педа Виталий Животков па Николай Кожевин машина тувман яңхсаңан. Љын СВО хоца улты ёхлува нётапса верман волонтера улдаңан. Ин манты ёх пидан холна Эдуард Байсарин па Антон Караянов пидтащсаңан. Манты юшел каматса щёрас километра

хойл. Вет хоятан манман, юшан ищи па кеншак.

Манты ёхлуд пидан хошам сохат, портунат, лэготат, соралтам солаң хул па нохар сэмат, няврэмат па хотгэл хоятатан ханшам письмайт, сай верты хушам холпат па арсыр мосты пормасат иса машинаята лэцсайт.

Муң па манам ёхлува пумащипа ясаң ясталуд. Щита улты хоятлуд ёхи лавалдалуд. Кашң хоятэв щаль, кашң хоятэв мосал. Юшел пайды па туң ат ул. Ходыена ёхи ёхтаты.

Зоя Куртямова
ханшам потар

Округ хоятлуд нох питсат

Хасям тал элты дохан хатэмиты па пошкан элты орытты округ хоятлуд яма лувилал эталтыдат. Там ялап талдан хасям лапатаң Рязань вошан манты касасайн округ хоятлуд олаң тахаята этсат.

Шоши мувев элты Рустам Каюмов па Александр Бектуганов Хон мув кубок этапан спринт хося олаң па кимет места вусчаң. Рустам вет километра нийлхус молтас минута хухлас па иса яма пошкан элты ортас. Пидхуйл нийл секундая лув элтэл ёлта хасяс. Пошкан элты орымал порайн, йи пуш ант хойс. Хулмет тахая Башкортостан мув элты Антон Бабилов этас. Љув нийл секундая хасяс па кат пуш ёвра орытас. Хасям талдан ван хатлап тыдасян Ижевск вошан Рустам Каюмов кат пуш хулмет места уйдыс.

Љохан хатэмиты па пошкан элты орытты ёх кутан,



Хор: skan.ru

Полина Плюснина Овс мув нэңиев касас. Љув Удмуртия мув элты округева ёхтас. Касасайн олаң па кимет тахая этас, сорнең па щелох мевал посчаң шитас.

Љохан хатэмиты па пошкан элты орытты Овс мув касты хоятлуд хув пора элты Сергей Сандуляканан лэсятлайт. Хасям тал касты ёх лэсятты холна Максим Максимов вохса. Хасям па ялап талдан хон муван

манты касасаятан па хоятат кутан касты хоятлуд шеңк яма каслат. Олаң тахаята этлат. Љын кашң порайн дохан хатэмиты па пошкан элты эсалты хоятлува ясталдаң, альдаңан, хоты ямашак рупитты, муй си кеша верты, мосал. Си ураңан мосаң яма иса тыйл. Елды педа рупатаел яха туты пидлэл.

Альбина Тырлина ханшам потар

Куртат кутан машинайт эсалсайт

Там ванан Љорвош район куца ху айкед верас, муй щиран куртат кутан хоятат тутлыты Трэкол машина яңхты питад. Юш сохаптаты тынал тунял элты нох ант элдас.

Ялап тал тылащ яңмет хатадан олаң рейс Љоркурт, Горка вош па Овкурт педа верса. Љоркурта мантыйн, Мужи вош элты машина алаңсахат 08:00 щёсан этал. Кутан Горка вошан лойдыл. Ёхлы педа 11:30 щёсан манал.

Овкурта 09:00 щёсан манал. Манман, Ялап Кевавта йирэмал па Ямкуртан лойдыл. 13:30 щёсан Мужи вош педа ёхлы йил.

Куртат педа мантыйн, Мужи кутопан улты вош харан машина я омасла.

Трэкол машина, маты хатадан маты курт педа манал, юш тынал муй арат солкувая хойл, <https://admmuji.yanao.ru/activity/37175/> Љорвош район утхот сайт хоца вантты рахал.

Зоя Куртямова ханшам потар

Тал пора емаң хатл

Йис пора элты Марий Эл муван «Шорыкйол» тал пора ёхатты емаң хатл постаса. Руц ясаңан ястаты ки, щит «ош кур». Едпи там емаң хатл, ар тахайн Шортйол, Шартял и Шочьйол щиран аялса, щит «Ялап тал пора ёхатты емаң хатл».

Катра порайн емаң хатл кат лапат порылдыса. Там йисан йи лапат туп манал. Ялап талдан, ялап тыдащ энамты порайн емаң хатл постаты питщада. Кашң хатл арсыр вантопсайт версайт, ёнтты па якты харат лэщатсайт. Кулят, меңкат, молты войт альман пунаң сохат па венш хорат думатман, куйп сэңкман па луңханщап сыйңалман хоятат вошхулат хуват шушилдысат. Шушилдыты ёх пидан мет одна Васи Кугыза



Хор: finnougoria.ru

па Васи Кува шушсаңан. Руц щиран – Василий пирац ики ийимел пидан. Там хоятңан элты мет волаң вантопса ус.

Ар хоят яха актащман, куртаң хотат хуват яңхсат. Вантсат, маты хоятат хот овдал сыстама тайдалдал, муй арат вой хот волаң энамлда, пушасдал,

ампардал, мосты пормасдал туңа щира лэщатман ат усат. Щалта хотаң хоятлада ясталат, маты хотвод елды улапсайл хоты манал.

Айлат ёх па эвет, пид уятты щиран, ёнтман шепандысат. Сэм лап хатщаман хир элты ош пун вулат па вантсат, ху сая ман-

ты хоятал охсохдал муй хорпи питлат. Юш перна кутпа дойлат па худантлат, хота луңханщап сый худла, муй па валенка пушас ким пелка воцкалат па вантлат, маты мув сыл олаң элты уртыты ёх ёхатлат.

«Катра улапса щирлув энамты няврэматан уйтты ураңан, муң шеңк ун рупата тулув. Марий мув Йошкар-Ола волаң вошан арсыр вантопсайт, емаң хатлат, касты харат верылдылув. Рут мув вошат па куртат элты хоятат яха акатдалдув, мастер-классат лэщатлув, еңта пасан суратан, форуматан уйтантылув.

Рут ясеңев ант хурлаты, катра щир улапсаев елды туты, йис порайн улам емаң хатлат шавиты, щи верат нумман тайты ураңан айлат ёх уталтаты, щит элты иса потартлув», – Республиканской каш верты хот лаңкар куца нэ Ирина Якаева ястас.

Ёмвошан ялап кина этас



Хор: finnougoria.ru

2025-мет талдан Ёмвошан ялап этам «Культурная перезагрузка» кина альса. Нёхты хор лэщатам куца нэ Наталья Кадырова потартас, муй щиран катра пора ханты па охаль улапса там йис улапсайн ул, муй щиран хорам сый туты вер мохты па кина хоца альты рахал.

Нёхты хор верам порайн, ханты па охаль сох эталтаты «Манси Hoodie» проект тохи лэщатса. Щи вантопса катра пора ханты па охаль улапса альты «Торум Маа» хотан эталтаса.

«Едпи, ай удмеман, Ёмвошан ким этыйн, ныла, муң Овс

муван улдув. Вошхулат хуват шушман, сахаң нэңат, молщан па вай думтам ёх кашалаты рахал, юш хуват вулэң ухал манты верытал. Луңан охшаман нэңат, хорамаңа ёнтам ернасан, сак лопсат тайман шушилдылат. Там порайн щимащ от ант кашалалан. Вошев ар вошат хорпия йис. Хоятат холдыена йи хорпи руц соха думатдыман шушилдылат. Атэл щиран щикущ хорам, туп сэм олямты от антом.

Ёра думатты сох верты порайн, ищи утщилам ястаты: тухал хоятат сох ёнтты питтэлан, ханты па охаль ханшет тохи лэщатлат, щах ант нумасман, маты ханши муй тахайн рахал понты. Там муватан улты хоятат, йис пора элты, ханшидал хуват луңтапса тусат. Ханши хор верты порайн, кашң нувиел мира туты дув номас, дув потар тайл. Щит ураңан, ма номас тайсам, верты сохладман альты, хоты катра пора улапса там йис улапсайн тайты сохатан кашалаты рахал. Сохдам ёнтты елпийн ар ошаң нэпек луңатсам па ин улты мутра «искусственный интеллект» пидан па рупитсам», – ёра сох ёнтам нэ Ирина Сатыгина ястас.

Мордовия мув хорамат альты вантопса

Подлесная Тавля куртан, Владимир Ромашкин нэм тайты «Этно-кудо» катра пормас шавиты хот велщи питама ялап тал олаң хатлат элты тэдые мойң хоятатан ёхтылдыда.

Хон мувев волаң вош, Хон Петра па Нижний Новгород элты мойң хоятдал талаң хоттэлатан «Зов торамы» нэм тайты Мордовия мув хорамат альты этномаршрут вантты йилат.

Хорамаңа ёнтам ернасан, охшамат, карты ох элты верам мевал лопсат, сэвам антапкедат, арсыр хорпи нэ па ху милат умащдыман нох думатлат па хор вулат. Еша донщан лап

пудыйм, юх элты эвтам монщ хорат каман вантылат.

Пормас шавиты хотан рупитты ху Пётр Рябов мастер-класс верас. Мордовия мув хорамат вантам юпийн, тухлат юх эватты кеши олаң пуш ёшан катадман, «сорни найң дов» нёхарты омаслат.

Мойң хоятат кеша, «Толава» группайн арыты куртаң нэңат арсыр турсыйн тувман эрзян ясаңан арат арылат. Дув ардал худантман, донщан унтат нумалта, восты ёханат илан хайман, нопсэн хува манал. Матты ки нэмомты ун вош антом, туп щита улты рут ёх, катра хотат па йис пора улапса ул.



Хор: finnougoria.ru

«Земский учитель» программа хыйса



Хор: Эльвира Климова

«Земский учитель» программа 2030-мет тал маса хыйса. Ялап тал тыдащ аламет хатл 2025-мет тал эвалт лув федеральной проект «Педагоги и наставники» йилап нацпроект «Молодёжь и дети» хоца лоцас.

Ши программа онтасна, похлатна олты ашколайтна учитель-предметник тарамман ол.

Похлатна ропытта манты нявремат онтады нэхэт ох нятапсына мадайт. Дальневосточной федеральной округна ропытты учителят 2 млн солкувайна сохаптадайт, там тал эвалт, ши Донецкой Народной Республика па Луганской Народной Ре-

спублика, Запорожской па Херсонской область пела ропытта мантытат лоцлат. Па ай похлатна ропытта манты нэхэт 1 млн солкувайна мадайт.

«Хон мув Президент Владимир Путин партам щирна, ши программа 2030-мет тал маса лэщатса», – вице-премьер Дмитрий Чернышенко лавас.

Ши томпына, щимащ педагогат ораңна касаң регионна каман сот нятапсы лэщатман ол. Лув кутладна – тал йи пус маты ох нятапсы, коммунальной услуга охлад парта сохаптадайт.

«Земский учитель» программа 2020-мет тал эвалт ропытта питас.

«Ворца хатл» мультфильм верта питса



Хор: ИА «Приуралье»

аниматорат арталата питлат, тарап нэхты па вес хорас верты порайна.

Итта мультфильм верты тахайна йилап технологияйт ёхатсат. Вес хорас верты порайна маска тайла, лув 3D-принтер онтасна верла. Сара верты ораңна съёмка иволап кат павильона манл. Щитна касаң кукла кат пус верман ол.

«Тата мет волаң роль енттыт – щит Ворца. Лув холна арита па ёкта питл. Ямас хорамла, Ямал мувна – Ворца хасам тутыт. Ищки мувна, лув па щипкет эвалт мет алцищ ёхтал, лув ёхаттал порайна, щитна па ищкет ант хайлат, йилап тал тутыт хорпи», – режиссёр Ольга Титова лавас.

Овс мув нэхэт манчат хуват, «Союзмультфильм» хоца «Ворца хатл» мультфильм холмет питл. Нилъёң тал манас, хоты аниматорат «Хвастливый мышонок» па «Сказки бабушки Ай-По» версат. Там мультфильм тал сыс верта дытдэл.

Хой ЕГЭ мата питл, заявление ханста веритлат

Курк тыдащ аламет хатл маса 11-мет класс етсаты, па туял ашкода эвалт элдасам нявремат, хой ЕГЭ мата питл, заявление ханста веритлат, щимащ айкел Рособрнадзор пресс-служба верас.

Заявление хансты порайна, масл дырамта, мала хорпи предмет мата питлат. Тампус етсаты выпускникат ораңна кат предмет обязательной – щит русский па математика. Па предметат пирыта рахал.

Экзамен холам этапна манта питл: досрочный ай кер тыдащ 21-мет хатл эвалт пинтщад па ун кер 21-мет хатлна етсал, основной – Ас нопатты тыдащ 23-мет хатл эвалт уц тыдащ 23-мет хатл маса, дополнительной – щёхар тыдащ 4-мет хатл эвалт 23-мет хатл маса. Хой атмащ ки ханссалды, йилаптан уйт дор тыдащ 3-мет па 4-мет хатлна мата рахта питл.



Хор: ЯНАО губернатор пресс-служба

ОБЪЯВЛЕНИЕ

СЛУЖБА ПО КонтРАКТУ В ВС РФ ПОЛНАЯ ИНФОРМАЦИЯ ПО ТЕЛЕФОНУ **8(902)81-6-11-90** ЗВОНОК ПО РОССИИ БЕСПЛАТНО

ВРЕМЯ ДЛЯ ВАЖНЫХ РЕШЕНИЙ!

КонтРАКТНАЯ СЛУЖБА
5 000 000 Р
ЕДИНОВРЕМЕННАЯ ВЫПЛАТА
2 300 000 Р

ПРИ ЗАКЛЮЧЕНИИ КонтРАКТА НА ЯМАЛЕ

Прибывающим с других регионов, возмещаются затраты на проезд от места проживания до г. Салехарда. В период формирования проживания в г. Салехарде бесплатно, 3-х разовое бесплатное питание!

ОБУЧЕНИЯ:

- ✓ ОПЕРАТОРОВ БЕСПИЛОТНЫХ ЛЕТАТЕЛЬНЫХ АППАРАТОВ
- ✓ ТАКТИЧЕСКАЯ БОЕВАЯ
- ✓ МЕДИЦИНСКАЯ ПОДГОТОВКА

1 900 000 Р ЕДИНОВРЕМЕННО ОТ РЕГИОНА
до 120 000 Р СЕРТИФИКАТ НА РЕАБИЛИТАЦИЮ

400 000 Р МИНИСТЕРСТВО ОБОРОНЫ
ЗАКЛЮЧЕНИЕ ВОЕННОГО СОЦИАЛЬНОГО КонтРАКТА

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО

РЯДОВОЙ
ОТ 210 Т.Р.

СЕРЖАНТ
ОТ 232 Т.Р.

ПРАПОРЩИК
ОТ 292 Т.Р.



СУРГУТСКИЙ
ДИАЛЕКТ

Эй латнэ юхдэх тьорэс қонөңнэ, вөнтлэх тьорэс қонөңнэ, қелэм еисат вәлдәт. Дәх қөвилты вәлдмил – қөяхинэ вули, дәх ванәлты вәлдмил – қөяхинэ вули.

Қатләпты нөрәм войәх күр әвәтмин йәңқиләдәт, қатләпты вөнт войәх күр әвәтмин йәңқиләдәт. Аләмтыл арит, қонтәмтыл арит пәхтә вөқи, пәхтә ньөвөс йәкә туләт.

Тютләднат, ат вәда әй сөңнам қөрәнтәхәлдәт, сорәлтәхәлдәт. Алтәхдәтә, вөйәмтәхәлдәтә тәдәң вицәпә әнтәм. Әй латнэ әнәл пи еи ястәл:

– Мәң өдәң тәм вәлтавнә чәкәнтәм чай вәртә ими пәри тайлув.

Мәнихәл ястәлхән:

– Нүң тюминт мәтди вулән қунтә, вәр вулән қунтә, әй мәта сөңнам йәңқи.

Ат куләт-вөдәт, пыр қатәлхә йәхәма, әнәл еи ястәл:

– Я мәнлув.

Йәмчәк дәвәт пуләт панә ти мәнәт. Дәх қөвилты мәнмил – қөяхинэ вули, дәх ванәлты мәнмил – қөяхинэ вули.

Әй мәта латнэ улңәл йөвәтләх найәң воца йөвтәт, улңәл йөвәтләх уртәң воца йөвтәт. Тю улңәл йөвәтләх найәң воца йөвтәт, улңәл йөвәтләх уртәң воца йөвтәт, тәми воц күтәпнә тәрәма қойәм өвәр аңкәл, мәха қойәм өвәр аңкәл.

Тю йәм вәх аңкәл төйнә қәнқан мети тәт омәсл. Еихәл сарәлта мәнхән. Мәни, Дәпәт мәх, қут мәх ики пырәлта йүвмәл сохит. Аңкәл қутьәңә йөвәтмәл латнә, дәв нюрәд нөк тәялүтәтәх. Мети қонәни тәд йәләкинт, мети ылә ньөримтәтәх, кармана пәнәтәх.

Анта қөвилты мәнмил пырнә, антә ванәлты мәнмил пырнә, әй латнә воц өвәр қота йөвтәт, пухәл өвәр қота йөвтәт. Тю воц өвәр қота, пухәл өвәр қота йөвәтмида, еихәл дәв нюрдән йүрәмтәккән панә қота ләнқән. Лүв Дәпәт мәх,



Хор: gasfokus.ru

Дәпәт мәх, қут мәх Ләлхәм қон-ики

қут мәх ики мәталәң рохәпат кемән кәлипта қыть.

Тәд сохит әтьә дәв нюрәд ылә йүртәх. Қота дәңта йәхмәл латнә, мети пөкәл әнәл еил дәв пәнкләк өвтыя пәнәмтәтәх. Йәкә дәң. Лүв төппә йәкә дәң, мунт тю аңкәл қутьәңнә күнтхәм йох қота ти питәт:

– Мәң мети пөқлув қөль мәчә йүвәм пәхәтнә, мәң ләхат аңьләнқә әнтә вулув, тютәтнә мети пөқлув туви.

Төрәм қон ики ястәл:

– Ма қөль вәдәм, тувәм өт?

Қөв мәрахә йәхәм латнә, Дәпәт мәх, қут мәх ики ястәл:

– Ма мунт йәқәнам дәңта йәхмама вүйәм, әнәл еем дәв пәнкләк өвтынә мети пөкәл өл.

Кем ти ливтәт, аръялта ти вәри, тәми дәв пәнкләк өвтынә аңкәл төйнә омсәм мети. Төрәм қон икинә әнәлпи еил йәх пәхәты күт пәләки катләмты, йәкә вәи, дәпәт рөңкинтәп сая, дәпәт күвләк сая умәттәх:

– Вәң қө – таң қө!

Тәд пори вәрәт, воц тәд әнәл пори дәвипәлтәт, пухәл тәд әнәл пори дәвипәлтәт. Тәм омәстә аричымәли әнәл лүңкәт-қалтәт әйнам дәв йырат вәрат, мәс йырат вәрат.

Пори ливмил-енътьмил пырнә еисахән, күтәппи еи панә айпи мәни ястәлхән:

– Я мин мәнәтә қөв йәңкмән, қөдхә қөвән. Мәнәтә қөв мәхмән қөдхә қөвән. Мин мәнләмән.

Дәпәт мәх, қут мәх ики ястәл:

– Нүң, әнәл еи аңьәкәмнат, мәң пәрхинам пычувнә йәңқи суриңнә дюнътиттән, пай киври суриңнә дюнътиттән.

Тәд сохит йоққән еисахән ти мәнхән.

Ти мәнхән, мәнхән еисахән, әй мәта латнә әтьә воц пухәла йөвәтхән. Төвә йөвәтмина, әй тю сохит мол иты мети пөқләт-учәт нюла мойләт, пори вәрәт.

Дәпәт мәх, қут мәх ики тәт ат кул, вөд. Пыр қатәлхә йәхәм латнә, ястәх:

– Ма ти мәнләм. Тәд сохит сарнам мән. Мән, мән. Ас ванчәккәң дәпәт лора пит, Ас пәмәң дәпәт лора пит.

Ас ванчәң дәпәт лор йәчәннә, Ас пәмәң дәпәт лор йәчәннә, әй сәм улңәлнат вуйтәх, қөнтхи пәләкнә өңк юхәп тәявләк, йәврәх юхәт тәявләк. Тю тәявләкәтнә әй сөңнам төппә қәнтәх мәнәм пөхәл вәсәт.

Мәнәм ләкәт, пәртхинам ләк әнтәм. Лүв тю тохьи әй мәчхә мән.

Чымәд мән, өс воц пухәла йөвәт. Тю воц өвәр қот, пухәл өвәр қот қутьәңнә дәв нюр ворхәта йүрәмтәтәх. Йәкә дәң. Дәпәт мәх, қут мәх қө қота ләнмәл латнә, тәрәм қонәңнә омсәм икихән-имихән, әйнә нөк дюдәмтәккән: – О-о-о, дәпәт ол мәрә мәнчәм, қут ол мәрә манчәм ичәк вәңәлмән, вәңәлмән! Тәм қорасәп сөй мәври юңкла йәм қатланат, әтәр мәври йәм қатланат тәх ти йөвтән!

Төвә дәпәт рөңкинтәп сая, дәпәт тәрәм сая умты. Пори вәрәт.

(Елды па ул)

Василий Данилович
Востокин потартыйс,
Аркадий Михалёв нәпека
ханшильдыйс
(уц тыдащ 2000-мет
тал-луң).



Хор: gasfokus.ru



Хор: culture.ru

Авка

Там манц Авка пуцци, лув па авкайт пилна ханятыман ентмал порайна, вул ланц пай илпина лоңмал, щи курамна щимащ ватас пинтщас па, щита лап партасса. Ватас камантсы хатл поласас, щитна лув щилта ким этта ант веритас. Хонты ват раммаадна, Авка сыяласды, Овс мувна отща хыщмал...

Товы тампус алаң ёхтас. Ланщи пайт найна ил няратсайт, соймаат хощ пахантсат па каман пелак педа овлат, варсат миллал ил ласкаслад па охлад най пела таласта питсат.

Овс мувна ям, хасам. Хатлат хувви йисат, най палтан лайл. Кадаңат щарс педа нёхтасэл, щита пилна сымалсак. Раман сослат па хата антам ант вантыдат: хатл навина кадаң парты вай эвалт тэлна ант палдат. Авкайт па июпина нёхамтылат, ланц пайт томпына ханятыман ентта питыдылат.

Йи Авка мохыдал эвалт хувви алнищ нёхамтас. Пал ланц илпина щи ханемас: «Итта вантлэв, хоты нын манэм моцатлалдан».

Щи курамна, торам падаңна лап туса, щимащ ватас пинтщас. Ланц – хат путар иты Торам маса адмасас. Итта хоты Авка ханятым ланц пай хат иты йис, нёл ким эттады вус антам. Патдам. Палтап. Ват щиты омыйл: «У-у-уу».

Мала арат пора манас – маса, хатл, маса, кат, маса, холна па ар – хой ошл. Авка ай ос, мала арат хатл манмал оштал антам. Щи хоты ватас раммас. Авка ким этас – хата антам ланц па ланц. Па кадаңат ант ныдайт. Век отща хыщмал, каман пелак педа вантыйс, нэмаса



Хор: Вера Лонгортова

ант сыялас па халдата питас. Щи курамна, мала хасам ат кепа лув сэмдал, веслаңхтал хоща щи хайс, сэмъийнклал нох саралсайт. Щи эвалт щит Най палңат локки вастамал па хасмал Авка хоща хаймал. Най Авка хасмалсалды па лавал:

– Ал халда. Ивейна ным мув педа мана, вул ёхан хоща ант эттэн маса. Щита щи кадаңат моцатлалдан. Ма па, наңен соста кон олтал ораңна, ланц хощ лаллэм.

Иттам Авка амтас, Най элты пумащипа лавас па ным мув педа нёхамтас. Мала арат лув щиты нёхамтас – хатл, кат – хой ошл. Топ, имоса порайна лув ищалтэл кадаң парты вай хайс. Кадаң парты вай Авка сыялас па номасл: «Там Авка ма юхы дылэм».

Топ кадаң парты вай холна сэңк тумайң ос. Щитна, лув Авка педа умащдыман лавал:

– Холащ мандан?
– Ма ным мув педа мандам,
– Авка лавал.



Хор: onearth.org

та веритл. Щитна ма наң пилэнна мандам. Ма наңен савита питлэм, пиланңи кас.

Авка лавал:

– Ат ол, яха мандаман!

Мала арат дын щиты соссаңан, нэмоттыт ант ошл.

Касаң порайна, щутщата хойтанна, кадаң парты вай номасл: «Итта мохты дыта рахал. Топ ант ошдам хата па кадаңат оллат. Анта, лайласлам».

Имоса порайна, Авка нох верламадна, охал нох алэмасды, вантлалды мала кепа ал волийл.

Нох навармас, щит ёхан олмал! Йиңк хуват ёң лапсат мандат, ёхан томпына хувн ай путы поталэт ныдайт. Ямас вантас па – щит кадаңат. Амэл па ащел моцатас!

Авка амтас, ёхан педа нёхамтас, йи ёңк пул элты навармас, щилта кимет, щиты навартал эвалт кимет пелакна ёхтас.

Кадаң парты вай сыяласды, дытытл хонтта питас, Авка юпина нёхамтас. Ёхан сылна лайман увал:

– Хол мантсан? Манэм ал хыйи.

– Наң ма итэм веры, – Авка лавал. – Навра ёңкат хуват.

Навармас кадаң парты вай ёңк элты, лув па хощ сукалас, иттам кадаң парты вай йиңк илпина манас.

Щиты, Авка дылаңни хыщас. Тащ хоща ёхатмадна, мохыдал аматсат. Авка яйлал пилна нёхамтыта па ентта питас, топ щи пора эвалт хувви ант манас.

– Малай наң отща мандан? – кадаң парты вайна инщисла.

– Ватас ос, ма мохыдам эвалт хыщсам. Итта лувилал нёхалдам, – Авка лавал.

«Мала хорпи атсам авка, – кадаң парты вай номасл, – мохты дыта ант масл, сэңк ай па корыман ол. Манэм йи пеңк тэл. Лув пилэдна мандам, лув манэм тащ хоща тулды, хата па Авка тэдыйи».

Щитна, щиты лавас:

– Палтап отща орна. Отща сосыт каман наңклатна пит-

Вера Лонгортова
лэщатсалды

Куртат тадан

Там порайн вошатан па куртатан катра хот ант па хасяс. Ялап хотат омасты пйтсайт. Ай куртат, хота модты кем хот уд иси пентты утсидайт. Сита удты хоятат уншак куртата па вошата удты китдайт.

Пора сора манамтад. Ай куртлуд ешауд тада йилат. Няврэмат катра хотат нэпекан туп вантты пйтдат па потрат эдты худты.

Хун курта ёхтыдыдан, туп си порайн нумадмидан, хоты энамты пораен манас, хоты хотэнан усан. Хоты кур алдыса, юх сэварса па ёхан эдты йицк тутдыса.

Муң куртыйилуд ходна дыднат, улапсаед уд. Хоятат курат алдыдат, йицк тутдыдат, «Буран» донсь хопан яңхлат, вой энмалдат.

Там лопасан Лорвош район куртатан верам хорат понтсам. Вантаты па умасьдыяты. Мосаң хой, си хорат вантгыйн, удты куртыед, ай порайн энмам улапсайд нумадмийд.

Альбина Тырлина
ханшам потар



Хор: Альбина Тырлина

Газета «ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнуянца,
д.1, каб. 106
(34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д.9, каб.708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 0014

Подписные индексы:
на год – ПА700, на полугодие – ПР561

№ 3 (1254)

Газета вышла в свет 18 января 2025г.
Подписано в печать 16 января 2025г.
по графику: 16.00
фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб.708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнуянца, д.1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, 39А

И.о. генерального директора

АНО «Ямал-Медиа»
Каврук
Татьяна Ивановна

Главный редактор

Яковлева
Алина
Кирилловна